



VP Schmidt na Sigurnosnoj konferenciji u Minhenu: Euroatlantske integracije ključne za razvoj i napredak u BiH

Visoki predstavnik Christian Schmidt je tokom sudjelovanja na Sigurnosnoj konferenciji u Minhenu istaknuo ključni značaj reformskog angažmana Bosne i Hercegovine s Evropskom unijom. Visoki predstavnik Schmidt je naglasio da je za BiH neophodno dati prioritet naporima u pravcu evroatlantskih integracija kako bi jačala stabilnost, sigurnost i napredak kako u zemlji tako i u regionu.

Sudjelujući u radu konferencije, visoki predstavnik Schmidt je učestvovao u diskusiji o unapređenju reformskih procesa u Bosni i Hercegovini. U tom kontekstu, sastao se i sa ministrima vanjskih poslova zemalja članica EU i transatlantskih partnera, visokim zvaničnicima EU i NATO-a, komandantom Komande združenih savezničkih snaga u Napulju admiralom Stuartom B. Munschom i specijalnim izaslanikom Ujedinjenog Kraljevstva za Zapadni Balkan sir Stuartom Peachom.

„Angažman usmjeren na evroatlantske integracije ima ključni značaj za budućnost Bosne i Hercegovine“, rekao je visoki predstavnik Schmidt. „Za BiH je od suštinskog značaja da aktivno provodi reforme i jača svoje veze sa EU kako bi osigurala stabilnost i prosperitet za svoje građane.“

Visoki predstavnik je istaknuo da je osiguranje integriteta izbora od suštinskog značaja za stvaranje stabilnog i sigurnog političkog okruženja koje pogoduje dalnjem razvoju i napretku zemlje. „Integritet izbora je temeljni faktor u izgradnji povjerenja u politički sistem. To je potrebno uskoro realizirati kako bi se unaprijeđena pravila mogla primjenjivati već tokom održavanja općinskih izbora u oktobru 2024. godine“, zaključio je visoki predstavnik Schmidt.